


TEZAU LITURGIC

21 APRILIE

ACATISTUL SF.PREOT-MUCENIC VASILE MARTÎȘ DE LA HOLM



MOSCOVA, 2000



Акафист священномученику Василию Мартышу

Кондак 1

Избранный сыне народу польскаго, предивный
угодниче Христов, веры православныя
неутомимый благовестниче, яко добрый сеятель
на ниве Христове, в сердца чад Божиих истину
Христову в старом и новом свете, усердно всеял
еси. Ныне же, во славе со ликом мученик
добропобедных Иисусу Сладчайшему
предстояще, не престай молиться за ны ко
Господу, да дарует народом славянским мир и
безмятежие, церкви Святей Своей от ересей и
расколов ограждение, да твоими молитвами от
бед избавляеми, благодарно зовем ти:
Радуйся, священномучениче Василие, Церкви
Польския похвало и всех православных
утверждение.

Или:

Радуйся, молитвениче наш, скорый помощниче,
священномучениче Василие.

Икос 1

Ангела пламенеюща духом и во плоти суща
человека, избра тя Господь быти служителя
Церкви Святей и стаду Своему пастыря добра,

от юности бо твоея Богу Единому сердцем и душою прилежал еси. Мы же имуще в тебе образ пастыря добра умильно взываем ти:
Радуйся, Богом избранный и освященный наш пастырю;
Радуйся, чистый разумом, всею душою Бога возлюбивый;
Радуйся, в житии твоём Тому усердно послуживый.
Радуйся, в незлобии сердце твое соблюдый;
Радуйся, иго Христова от юности радуясь восприявый
Радуйся, яко в подвиге твоём имя пресвятыя Троицы дивно прославися.
Радуйся, просвещение мудростию Божиею сущих в неверии.
Радуйся, верность Православию мученичеством доказавый.
Радуйся, священномучениче Василие, Церкви Польския похвало и всех православных утверждение.

Кондак 2

Видя Господь велию веру и усердие твое к Нему, яко измлада прилежал еси божественней службе и всякому благочестию, и на служение пастыря для народов заморских, а послеже и воинов польских постави. Ты же подвиг сей добльственне совершал еси, выну воспевая

благодееющему и укрепляющему тя Христу Богу:
Аллилуиа.

Икос 2

Разумом богопросвещенным в познании истины
преуспевал еси, достоблаженне Василие,
мудростию духовною обогащаяся, исполняяся
крепости божественныя, добродетели
евангельския невозвратно души своей присвояя.
Темже мы, покланяющеся милосердному Богу,
таковы дивны сокровища тебе даровавшему, во
умилении глаголем ти:

Радуйся, родителей благочестивых отрасль
благоуханная;

Радуйся, в купели святого крещения благодатию
Духа Святого просвещенный.

Радуйся, Пастыреначальника Господа нашего
Иисуса Христа благоволение;

Радуйся, благочестию родительскому измлада
поревновавый;

Радуйся, в творении заповедей Божиих себе
чиста издетска утвердивый;

Радуйся, от юности твоя вся мира сего красная,
Бога ради, презревый.

Радуйся, яко от утра жизни твоя на стражу
словеснаго стада избран был еси;

Радуйся, яко до вечера жития твоего сущия в
вере нелестно назидал еси.

Радуйся, священномучениче Василие, Церкви

Польския похвало и всех православных утверждение.

Кондак 3

Силою Христовою укрепляемый, прехвальне отче Василие, несомненно упования твоя на Иисуса Сладчайшего возложил еси, и со смирением приял еси назначение на служение пастырское в Новом Свете, подвигом добрым подвизатися хотящи. Евангельстей истине поревновавши, сораспятися Господу всем сердцем возжелал еси, по пути спасения за Ним последовал еси, веру в Троицу Божественную проповедовал еси в странах хладных и полночных, Богу же с благодарностию за всех и вся вопиючи: Аллилуйя.

Икос 3

Имея помысл чист и душу непорочну, священства благодать достойно восприял еси, отче Василие; наставлением святителя Тихона и иных наставник духоносных благоговейно внимая, ревностно подвизался еси о спасении Богом врученного тебе словеснаго стада. И восходя благодатию Божиею от силы в силу, вел еси за собою всех тех, кои жаждущи душевнаго спасения, внимали твоему душеполезному учению, ведая образ твоего чистаго жития. Сего ради вопием ти сице:

Радуйся, селения Господня - храмы святые паче всех селений земных возлюбивый.

Радуйся, Божественныя службы и Христова учения паче всех деяний взыскававый.

Радуйся, евангельских велений верный блюстителю.

Радуйся, Христовых словес твердый хранителю.

Радуйся, креста своего усердный носителю.

Радуйся, иго Христова и бремя Его благодушно подъемый.

Радуйся, яко не обративыйся вспять в шествии к Горнему Иерусалиму.

Радуйся, яко Сладчайшему Иисусу до конца послужил еси.

Радуйся, яко наслаждаешься лицезрения Божия.

Радуйся, священномучениче Василие, Церкви Польския похвало и всех православных утверждение.

Кондак 4

Бурею страстей и треволненьми во многомятежном мире непоколебимый в тихое пристанище спасения душу твою управил еси, вся благая и красная мира презрев, призывая и всех быти причастником горняго Царствия, идеже ныне пребываеши, поя Богу: Аллилуиа.

Икос 4

Слыша слово Господа, чрез пророка глаголюща:
«призови Мя в день скорби твоя, и изму тя», ты,
святый Василие, в скорбех и тяготех своих
прибегал еси ко Господу, прося умножити и
укрепити веру твою. Темже молимся ти: укрепи
слабую веру и в нас немощных, зовущих ти
так:

Радуйся, плоды духовныя: любовь, мир и
долготерпение стяжавший;

Радуйся, пример смирения, кротости и
воздержания подававший.

Радуйся, слабую веру выну незыблемою бытии
сотворяющий;

Радуйся, жертвенной любви к ближнему
научающий;

Радуйся, вопреки скорбем лучами животворныя
надежды озаряющий;

Радуйся, от страстей греховных волю нашу
исцеляющий;

Радуйся, укреплятися таинствами Церкви всех
нас сподвигающий;

Радуйся, в возрастанию и разумению духовному
нас утверждающий

Радуйся, священномучениче Василие, Церкви
Польския похвало и всех православных
утверждение.

Кондак 5

Боготечная звезда в скорби сущим явился еси, богоглаголивый проповедниче Василие, Ты же, любовьию ко Христу пламенея и взирая на страдания Его, безбоязненно призывал еси паству свою: имети совесть незазорную и любити друг друга, якоже Господь возлюбил нас, во еже, не токмо zde, но и в селении праведных, воспевати Творцу нашему: Аллилуиа.

Икос 5

Видевше, в немногих храмах, подобно оазисам в бескрайней язычества и теплохладия пустыне стоящих, американскую паству твою у источников истинного богопочитания и благочестия пиющую воду живу, апостолом Христовым соревнуя, силою Божиею, святыи Василие, превозмогал еси немощи и болезни твоя, благовременне и безвременно усердно сию посещал еси, назидая в вере, укрепляя в надежде и утверждая в любви. Сего ради вернии научишася воспевати тебе таковая: Радуйся, на путь истинный заблудшия направляющий.

Радуйся, земли Американской исповедниче и покровителю.

Радуйся, словом мудрым всех притекающих в лавку к тебе питающий.

Радуйся, светильниче имже мнози человецы

просвещаются.

Радуйся, мир с Господом сбрегати и хранить помогай;

Радуйся, милость Богородицы ко всем нам приклоняющий;

Радуйся, дарами благодати и милосердия молящихся тебе обогащающий;

Радуйся, священномучениче Василие, Церкви Польския похвало и всех православных утверждение.

Кондак 6

Проповедание медоточивых уст твоих, богоглаголиве Василие, никогдаже источашеся, ниже заграждашеся, преславне исповедниче Христов, ты бо неустанно благовествовал еси многоплеменным людем Новаго Света, по бескрайним просторам Америки полнотной разсосредоточенным, от обычаев душетленных словом и примером жития твоего отвращатися призывая, да поют вси Господеви песнь покаяния и благодарения: Аллилуия.

Икос 6

Возсия свет твоих добродетелей, блаженне Василие, и Христоподрожательныя любве твоея всем ищущим спасения вечнаго и путем скорбным и тернистым со упованием и непреклонною верою в силу Божию, в немощи

человеческой совершающуюся, шествующим. Иже, благодаряще Бога, даровавшего им зрети в тебе благодать, юже апостол языков Павел исповеда, вопия: вся могу о укрепляющем мя Христе Иисусе, во умилении возглашают ти таковая:

Радуйся, скорбей сердец наших успокоение благодатное;

Радуйся, кичений ума нашего благодатное умирение;

Радуйся, тлетворных и душевредных страстей скорое обуздание;

Радуйся, от пустословия и осуждения чтущих тя отвращающий;

Радуйся, очей разума нашего преславное озарение;

Радуйся, совести нашея страже недремлющий;

Радуйся, сущим в бедах скоро и преславно помогаяй.

Радуйся, скорби и печали в радость претворяяй.

Радуйся, велие милосердие Божие к земнородным приклоняющий;

Радуйся, священномучениче Василие, Церкви Польския похвало и всех православных утверждение.

Кондак 7

Хотя Всевидец Господь явити тя светильника державы нашея, и не под спудом, а на свещнице

высокой поставити, паки тя в державу
Польскую возврати, да явлен будеши миру.
Людие же православнии аки бисер многоценный
обретшии тя, радовахуся неизреченно и
возсылаху благодарственное пение Богу:
Аллилуиа.

Икос 7

Дивныя и доблестныя подвиги твоя
восхваляюще, добропобедне воине Христов
Василие, ублажаем тя, яко права веры
Православныя отстаивал и пред правителями
Речи Посполитой, яко ближние и дальние, к тебе
текоша за добрым советом и помощью, яко
многие утешение от тебе с радостию прияша. Ты
же усердно внимал еси людям, пася их
прилежно и нужды их исполняя, и за все
повелевая благодарити Творца всея твари.
Темже и мы, тя почитающе, ублажаем зовуще:
Радуйся, розго винограда Христова, мног плод в
пособие православным творящая.
Радуйся, благовестителю света Христова,
омраченная очеса и сердца народа просвещаяй.
Радуйся, служителю Божий, гонения правды
ради смиренно претерпевый.
Радуйся, провозвестниче Благодати,
сумнящихся в вере словом Божиим утверждаяй.
Радуйся, пастырю Богомудрый, православное
юношество ко спасению наставляй

Радуйся, добрых нравов и любви к Богу и ближним насадителю.

Радуйся, великий предстателю бедствующим в море житейском.

Радуйся, благодатный утешителю всех славящих имя твое.

Радуйся, священномучениче Василие, Церкви Польския похвало и всех православных утверждение.

Кондак 8

Странника и пришельца себе на земли быти помышляя, в земней жизни своей бывше, пастыреначальнику Христу последующе, не имел еси где главы подклонити, ради неусыпных трудов ваших о пастве своей; покоя не имуще, назирал еси ю, взывающе к Богу: Аллилуиа.

Икос 8

Весь в Бозе быв, преславне отче Василие, о Бозе и угождении Ему, всецело послужил еси ближним твоим учаще оныя словом и делом, како надлежит во благочестии жити, приходиша к тебе ближнии и дальнии послушати словес твоих и житию добродетельному учиться. Молим тя, угодниче Божий, сподоби и нас хладных воспламениться любовью ко Господу, да возможем неосужденно вопити тебе:

Радуйся, грешники на покаяние наставивый.

Радуйся, кающийся с Богом примиривый.
Радуйся, отец чадолюбивый учеником твоим
бывый.
Радуйся, немощи немощных любвеобильно
носивый.
Радуйся, от винопития и суемудрия прехвально
исцеляющий;
Радуйся, в Бозе слабыя души наша досточудно
обновляющий;
Радуйся, ревновати о своем спасении нас
научающий.
Радуйся, к незамутненному познанию путей
Господних нас обращающий;
Радуйся, священномучениче Василие, Церкви
Польския похвало и всех православных
утверждение.

Кондак 9

Всем приходящим к тебе, священномучениче
прехвальне, отец чадолюбивый был еси,
наставляя на путь спасения, советами утешая и
укрепляя, отгоняя уныние бесовское от душ. В
годину великого испытания военного народ
польский в вере Христовей утверждал еси,
сомнения и маловерия удалитися призывая.
Чада же твоя духовныя же надежды исполняяся,
благодарне воспеваху о тебе Господеви:
Аллилуия.

Икос 9

Вития богомудрый был еси, преславне отче наш
Василие, и языком твоим, яко тростию
книжника скорописца, закон Бога твоего
начертавал еси на сердцах вверенных тебе
воинов польских, верно показуя им путь ко
спасению, по немуже сам неуклонно шествовал
еси до самыя мученической твоея кончины.

Темже приими от нас похвалы таковыя:

Радуйся, главо святая, благодатию Божиею
осененная.

Радуйся, проповедниче сладкоглаголивый,
вещающий словеса жизни вечныя.

Радуйся, душевными твоими очима выну
Господа созерцавый.

Радуйся, пред лицем Божиим, яко раб пред
Господом ходивый.

Радуйся, пред Оным, яко сын пред Отцем, яко
ученик пред Учителем шествовавый.

Радуйся, во вся дни живота твоего Его искавый
и в Нем намерение полагавый.

Радуйся, ищущим Царствия Небеснаго
спасительнаго пути проповедниче.

Радуйся, взыскующим горняго Иерусалима
богомудрый вождю;

Радуйся, священномучениче Василие, Церкви
Польския похвало и всех православных
утверждение.

Кондак 10

Спасти хотя душу свою, вся земная и временная во уметы вменил еси, богомудрый Василие, неуклонно крестным путем Спасителеви последовал еси, муки душевныя, страдания разнообразныя, осмеяния и заушения, унижения и биения претерпел еси от богоборцев зверонравных Сего ради освятился еси и неизреченныя милости сподобился еси со Ангелы и всеми святыми в небеснем царствии пети Богу: Аллилуйя.

Икос 10

Стена тверда и ограждение крепкое явился еси, многострадальне исповедниче, к тебе прибегающим и молитвеннаго предстательства твоего просящим в новых испытаниях веры сущих. Ты же, святой заступниче наш Василие, буди предстателем пред Богом за нас многогрешных, с верою и упованием вопиющих ти таковая:

Радуйся, гонения и смерть от нечестивых претерпевый;

Радуйся, от державы земныя во чертози небесные прешедый;

Радуйся, молитвою к Богу укрепившися и благословение вечное от Него восприемый;

Радуйся, подвижниче веры, угождение Богу от юности предызбравый;

Радуйся, путеводителю, правую стезю к
вечному спасению нам пока-зай;
Радуйся, омраченные зловерием, Светом Веры
Христовы просвещай;
Радуйся, в Бозе слабыя души наша досточудно
обновляющий;
Радуйся, в возрастанию и разумению духовному
нас утверждающий;
Радуйся, священномучениче Василие, Церкви
Польския похвало и всех православных
утверждение.

Кондак 11

Пение, иже приносим тебе, в похваление
преславных подвигов и чудес твоих,
достоблаженне Василие, несть довольно, обаче
ведаем благое твое о нас тщание и любовь твою.
Благоволи, заступниче наш многомилостиве,
вняти молитвам нашим и избавити нас от
прелести еретического зловерия и языческого
злонравия, да утренююще, чистым сердцем
приносим о тебе песнь Христу Богу: Аллилуия.

Икос 11

Светозарнаго светильника, елея молитвы чистыя
преисполнена, и пламенем веры светло сияюща,
воздвиги тя Господь, священномучениче
Василие, Богохранимей земле Польской. Мы же,
видим тя в Троическом Свете пребывающего и

всем христианом мира и благоденствия
просящего, с упованием веры, зовем ти
Радуйся, Христа паче благ временных чтити
наставляющий;
Радуйся, земныя пути наша ко благу присно
устраивающий;
Радуйся, в добродетелех смирения и братолюбия
утверждающий;
Радуйся, мечем молитвы пламенной нас
охраняющий;
Радуйся, огнем Духа Святаго плевелы зловерия
пожигающий.
Радуйся, омраченныя умом к Свету Истины
приводяй;
Радуйся, о спасении народа нашего
всеусерднейший попечителю;
Радуйся, добрых нравов и благочестия веры
насадителю.
Радуйся, священномучениче Василие, Церкви
Польския похвало и всех православных
утверждение.

Кондак 12

Благодать от Бога ти данную ведуще, прилежно
молим тя, отче наш предивный: пролей теплую
молитву о нас ко Господу, да дарует нам веру
нелицемерную, дух покаяния и смирения, да
воспоем Ему со умилением: Аллилуия.

Икос 12

Воспеваем богоугодное житие твое и кончину мученическую, богоносне Василие, величаем смирение и мудрость твою; торжествуем на земли небесную славу твою и веруем непреложно, яко много может молитва твоя, угодниче Господень, пред престолом Всемилосерднаго Царя Небеснаго. Его же моли возродити веру истинную в державе польстей, и ны в ней твердыми и плодоносными быти сотвори, горести и печали наша утоли, радости и утешения нам ниспошли. Сего ради взываем ти с надеждою сице:

Радуйся, благоутробия щедроты обильно всем даруяй.

Радуйся, ближних и дальних милостями твоими ущедряй.

Радуйся, бремя крестов наших преславно облегчаяй;

Радуйся, отрадою духовною все житие наше наполняяй;

Радуйся, истины взыскующим озарение благодатное ниспосылаяй;

Радуйся, от прельщений бесовских и заблуждений человеческих избавляяй;

Радуйся, скорбящих благий утешителю.

Радуйся, унывающих благодатный ободрителю.

Радуйся, священномучениче Василие, Церкви

Польския похвало и всех православных утверждение.

Кондак 13

О, многострадальне и всехвальне страстотерпче Василие! Приими малое сие моление наше, воздыханием сердец наших приносимое. И испроси, венчавшаго тя Господа, земли нашей благоденствия, людем же всем чистоты сердечныя и телесныя, благочестия, мира, братолюбия, милосердия и ревности об истине Христовей. Да Благодатию укрепляеми и утешаеми, сподобимся в Царствии Небесном вкупе с тобою пети Богу: Аллилуиа.

Молитва

О, прехвальный священномучениче и пастырю добрый словесных овец Христовых, отче наш Василие, скорый наш заступниче и помощниче в скорбех, бедах и всяких нуждах. Услыши нас грешных, к тебе прибегающих и молящихся. Испроси предстательством твоим у Всемилостиваго Бога нашего мир Церкви Его, под знаменiem Креста воинствующей, тишину помыслов наших, воздержание от пагубных страстей и покаяние. Ей, чадолюбивый и милостивый отче наш, священномучениче Василие! Тебе, предстоящему Престолу Господню, ведомы вся нужды наша

духовныя и житейскія. Призри на нас отеческим оком и твоими молитвами утверди нас в вере, надежде и любви, суемудрия и расколы истреби, болящія исцели, печальныя утеши, обиженныя заступи, бедствующим помози, путешествующим спутешествуй. Не посрами нас, угодниче Божий, к тебе с верою притекающих, но яви древняя милости твоя, имиже отцем нашим вспомоствовал еси, не отрини и нас, предстоящих всечестней иконе твоей, яко тебе живу сущу.

Умоли убо Милостиваго Бога сохранитися нам до кончины дней наших в страхе Божиим, и да отпустит нам Господь вся прегрешения наша вольная и невольная, и твоим предстательством сподобит радости вечныя и насладится купно с тобою и со всеми святыми, во веки веков.

Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

I

**НОВОЕ
* НЕБО**